

EKALESIA FAAPOTOPOTOGA KERISIANO I AMERIKA SAMOA  
OFISA O A'OA'OGA KERISIANO



VASEGA AMATA MUAMUA

1 - 4 Tausaga



AUKUSO - TESEMA

2019

**AUKUSO 11, 2019.**

**MATAUPU: "O TAVITA."**

**TUSI FAITAU: I SAMUELU – 17: 12.**

**SINI AUTU: "Ia fa'amasani le fa'alogo a le fanau, ma taumafai e manatua le igoa ma le tagata o Tavita."**

**Fa'atomuaga:** O le fa'amoemoe lava o le Vasega Amata muamua, o le taumafai lea e fa'amamafa le latou fa'aloga o igoa o tagata o le Tusi Paia. Afai foi e mafai ona amata ai i'inei ona taumafai e fa'ata'ita'i ona ta'uta'u ia igoa, o se mea lelei tele lea. E leai se manatu e fa'aaogaina i le vasega lea le faitauina o le Tusi Paia, ae lelei pea ona ta'u i ai o tagata o lo'o talanoaina, o tagata mai totonu o le Tusi Paia. O Tusi Faitau o lo'o tu'uina atu i Vasega Amata, e mo lau Susuga a le faiaoga ma lau tapenaga, ae leai se fa'amoemoe o le a faitau i ai tamaiti. Ae afai e te silafia e mafai ma lē fa'alavelaveina ai le fiafia o fanau i le lesona, o le ute lena o lo tatou fa'amoemoe. O lo'o i lau Susuga lava le fa'atatau talafeagai, a ia tofua lava si manu ma si ana i'a, i lea Aso Sa ma lea Aso Sa, ma lē vave tofia ai lau solo i le galuega.

O le fa'amamafa lava o le mataupu ia amata ona fa'alogo ma manatua, ina ia aga'i i luga le a'oa'oina i le Aoga Aso Sa, a ua i ai se iloa o fanau i lea tagata ma lea tagata o le Tusi Paia. O le vasega amata muamua lava e fa'amaite ai tagata o le Tusi Paia. Pau lea o le faamoemoe o le fanau lea (1 -4 tausaga), e amata ai lo latou a'oa'oina i le Tusi Paia. O se faiga ia lē na o le tasi se Aso Sa e faia ai, a ia fa'amanatu pea lava pea i Aso Sa uma o le Aoga Aso Sa, igoa o le ā a'oa'oina i lea vaiaso ma lea vaiaso. E manaomia ai le lava o le onosa'i ma fiafia i uiga o tamaiti, e lē tatau ona ita pe afai e lē manatua e fanau se igoa mai le isi Aso Sa i le isi Aso Sa. O le faiaoga alofa i tamaiti, e onosa'i pea ma taumafai ia sologa lelei le matala malie o le mafaufau o le tamaitiiti e maitau ma taofi ai mea e a'oa'oina. Manatua, aua lava ne'i ave a tamaiti le silafia o lau Susuga a le faiaoga, e lē mafai e le fanau ona malamalama ai, ona fanau mai ai lea o le lē fiafia ma le augatā o le tamaitiiti, ma lē fia fa'alogo ai i lau Susuga, ona tupu loa lea o lou ita ma fa'atalapelo loa le a'oa'oina o le fanau. Ia aua lava nei galo iā te oe tausaga o tamaiti o le vasega lea o loo e a'oa'oina.

**Fa'amatalaina o le mataupu.**

1. Ta'u i tamaiti o le tagata e igoa iā Tavita o lo'o outou talanoa ai, o Tavita o le Tusi Paia, fa'ailoa lelei i ai, auā e i ai foi tagata ua igoa iā Tavita o le tou aulotu po'o aiga foi o fanau. Aemaise lava o le ā faigofie ona fiafia tamaiti e fa'alogologo, pe afai e i ai se tama e igoa iā Tavita i lau vasega.
2. O lo'o i lau Susuga le fa'amalamalamaina lelei o le 'ese'esega o Tavita i totonu o aiga ma nuu, ma le Tavita o le Tusi Paia. Fa'amatala i fanau a'o fa'agasolo pea i luga lo latou ola a'oa'oina i le Aoga Aso Sa, o le ā tele ai lava lo latou iloa i le tagata e igoa iā Tavita.

**Galuega faatino: "Fa'amautu i fanau tali o nai fesili faigofie ia, ma valivali ni a latou ata.**

- 1 O ai Tavita? **Tali:** O le atalii o Iese.
- 2 Toe fa'aupu e lau Susuga le fesili muamua. O ai le igoa o le tamā o Tavita? **Tali:** O Iese.
- 3 O fea le nuu o Tavita? **Tali:** O Petele'ema.
- 4 Toe fa'aupu le fesili lona tolu. O fea e sau ai Tavita? **Tali:** O Petele'ema.
- 5 O le ā le galuega a Tavita sa fai i lona aiga? **Tali:** Leoleo mamoe a lona tamā.

- 6 Afai e gafatia e fanau nisi fesili, ona saunia lea e lau Susuga i le ala faigofie lea ua tufa atu. Manatua e lē matuā manaomia le tele o fesili, ae lē mafai ona lagona e fanau ma taumafai e taofi. E lelei lava si tasi, lua, tolu, a ia maua. E aga'i pea i luga le a'oa'oina.

**Valiga o Ata.**

1. E fautuaina lau Susuga a le faiaoga, ina ia saunia lelei ni ata e mafai ona valivali e fanau. Afai e maua se ata fa'atusa o Tavita ua lelei tele, fa'afetai le lagolago mai.
2. O le galuega valivali, e taumafai ai lau Susuga e fa'ailoa i tamaiti foliga o laei (ofu), sa o'ofu ai tagata o le Tusi Paia, ma ia atunuu.
3. Afai e lelei tele fanau, a ua lē maua e lau Susuga ni ata, ona tufa lea i ai o ni pepa ma vali e vali ai lava so'o se ata o se tama e mafai e fanau, a ia tusi muamua e lau Susuga e fa'ata'ita'i i ai tamaiti.
4. Manatua, ia fa'afetai i fanau ma fai atu i ai, lelei tele le tama ma le teine lea. Aua le ita fa'amolemole. Ia fa'atāua galuega a tamaiti uma, aua le fa'a'ese'eseina.
5. Ia aoina ata a le fanau ma tu'u i ai se togi ina ia iloa ai e tamaiti, o lo'o fa'atāua a latou taumafaiga.

**Pese:** Fa'ai'u i se pese faigofie e saunia e lau Susuga a le faiaoga mo tamaiti.

**Tatalo:** E lelei iinei ona amata a'oa'oina ma fa'amausali i isi tamaiti o le vasega lea le Tatalo a le Alii. Aua le naunau ia tauloto i le Aso Sa e tasi pe lua foi, a ia faifai pea i Aso Sa uma seia o'o lava ina lē toe galo.

**Manuia le amataga o aoga i lenei lima masina.**

////////////////////////////////////

**AUKUSO 18, 2019.**

**MATAUPU: "O SAULO."**

**TUSI FAITAU: I SAMUELU: 9: 2 - 3.**

**SINI AUTU: "Ia fa'amasani le fa'alogo a tamaiti, ma taumafai e manatua le igoa ma le tagata o Saulo."**

**Fa'atomuaga:** Ua manino atu i le aso sa ua mavae le sini ma le manulauti o lo'o tulimataina e le Vasega Amata Laiti, e aga'i atu i le Vasega Amata Matutua. O le fa'amoemoe lava, ia amata i le vasega lea ona fa'alogo ma taumafai e manatua igoa o tagata o le Tusi Paia. E i ai le taofi e aga'i atu i le Vasega Amata Matutua, ua faigofie ona fa'alautele le iloa ma le manatua o tagata sa a'oa'oina ma fa'alogo i ai. O le mea lea, e fa'amoemoe atu i lau Susuga a le faiaoga, o lo'o tele ai le sosia ma le tamāoaiga o au tapenaga, o le ā fa'asoa atu ai auala 'ese'ese e maua gofie ai i le fa'alogo ma manatua ai e le fanau mea o lo'o a'oa'oina. Ia manatua, e lē tapula'aina pe noatia i fa'asinoga a le tusi ua tapena atu, le lasi ma le tele o metotia, e tamāoaiga ai le a'oa'oina o tamaiti.

Pau lava le aio'iga, ia fua lelei i lo latou matutua, e lē o fanau uma foi e malolosi i le mafaufau. Ia fa'aeteete lava i le fa'afaigatā o lau talanoa i tamaiti, a ia saunia lelei lou siufofoga ma au taga, e momoli ai le talanoaga. Afai foi e fa'aogaina isi metotia e pei o ata, o mea faitino, ma isi, e fa'amalamalama ai le tagata, ua matua ova lava lau Susuga i le vateatea. E lē nauanau ia maua i le aso e tasi, a ia faifai so'o ma fa'amanatu pea, i o latou mafaufau lea tagata ma lea tagata, a'o le'i aga'i

atu i vasega i luga e fa'alautele ai. E lelei lava le mae'a o le aoga i lea Aso Sa ma lea Aso Sa, ua manatua sina fesili sa ia a'oa'oina.

**Fa'amanatu:** E ao lava ona toe fa'amanatu fesili o le vaiaso ua tuana'i, e te silafia ai le malosi o i ai le manatua o nai tamaiti, o i'ina foi e te silafia ai, e lē tutusa uma le malosi o mafau o fanau. Atonu o le ā aoga tele lea mo lau Susuga i au tapenega i isi mataupu o i luma, auā ua e masani i tamaiti.

**Fa'amatalaina o le mataupu.**

1. Fesili i tamaiti pe i ai se isi e igoa iā Saulo, a le o lena, fai i ai pe iloa e se tamaitiiti se tagata e igoa iā Saulo. Fai i tamaiti e mate ane po'o le igoa o Saulo e fa'aigoa ai se **tama** po'o **se teine**, ia po'o se **tamāloa** po'o se **fafine**.
2. Tau ina fa'amata 'osi e lau Susuga le 'ese'esega o upu o lo'o fa'aolaola atu i luga, ae aua ne'i mamafa.
3. Faamatala i tamaiti o Saulo o le tamāloa o le Tusi Paia lea e talanoa ai outou, o le mea lena e tatau ai ona latou manatua.
4. Saunia pea lau Susuga i nisi fa'amatalaga faigofie o Saulo e mafai ona e maua, e fetauti ma manatua gofie e tamaiti, e pei ona fa'asoa atu.

**Galuega Faatin: Fesili ma valiga ata.**

1. O ai Saulo? **Tali:** O le atalii o Kiso.
2. Toe fa'aupu le fesili muamua, O ai le igoa o le tama o Saulo?/O ai le tama o Saulo? **Tali:** Kiso
3. O le a le galuega a Saulo? **Tali:** Sa fai ma tupu muamua o Isaraelu.
4. Toe fa'aupu le fesili tolu. O ai le tupu muamua o Isaraelu? **Tali:** Saulo.
5. Saunia e lau Susuga ni nai fesili faigofie e maua mai le Tusi Faitau e fa'amatala atili ai le tagata o Saulo. Ia tautuana lava aua nei faigatā i tamaiti, E lelei le amata e lau Susuga le tali ae fa'auma ane e tamaiti, pe afai o le ā tuai ona tali ane.

**Valigā ata.**

1. O le fa'amomoe lava o le valigā, ata ia gaoioi tamaiti e fa'atino. Afai e maua se ata o Saulo, e lelei ona saunia ni kopi ma tufa i tamaiti e valiina ai.
2. Ia fa'aali i le fanau foliga o le ata ma taumafai e fa'ataitai ona vali. E tāua le fesoasoani o lau Susuga i le fa'atonutonuina o le valigā.
3. Afai e lē mafai ona maua se kopi o le ata o Saulo, tusi e lau Susuga se ata e tau latalata i ai, ae tufa pepa i tamaiti e tusi ma vali ai lava e le tamaitiiti lana ata.
4. Manatua, ia fa'afetai i nai tamaiti ma fa'amalō i ai i lo latou taumafai, ma e fai atu i ai, lelei tele le tama po'o le teine lea.
5. Ao ata a tamaiti ma tu'u i ai se togi na te lagonaina ai o lo'o tāua iā te oe lana taumafaiga e vali le ata.

**Pese:** Ia saunia se pese faigofie ma ni taga faigofie e fa'ai'u ai le mataupu.

**Tatalo:** Ia fa'aauau pea ona tauloto le tatalo a le Alii, seia o'o ina mausali ma lē toe galo.

**Manuia le aoga i lenei Aso Sa.**

////////////////////////////////////

**AUKUSO 25, 2019.**

**MATAUPU: "O APERAAMO."**

**TUSI FAITAU: KENESE 12: 2**

**SINI AUTU: "Ia fa'amasani le fa'alogo a tamaiti, ma taumafai e maitau ma manatua le igoa o le tagata e igoa iā Aperaamo."**

**Upu Tomua:** E leai se 'ese'ese o mataupu ua mae'a ma lenei foi mataupu e fa'asolo atu pea i luma. O lo'o taumafai pea ia maumautaia e ā outou Susuga i faiaoga le fa'amoemoe mo ā tatou Vasega Amata e pei ona taumafai atu ai lo tatou ofisa. O le fa'agasologa lava e tasi, o le a'ano lava ma le ute o le Vasega Amata Laiti, ia fiafia i le Aoga Aso Sa ma amata ona fa'alogo ma taumafai e maitau igoa o tagata o le Tusi Paia. E leai foi se fa'amoemoe o le ā mafai ona maitau i se Aso Sa e tasi, e i ai le talitonuga o le ofisa e faigatā i fanau ona manatua vave igoa i lo latou matutua ua i ai. Ae fa'amoemoe lava o le ā fa'amanatu pea ma toe fa'amanatu i Aso Sa uma. O lona uiga, o le fa'alogo lava ma le va'ai e faigofie ai fanau laiti nei. Fa'amoemoe foi o le ā tele sau tapenega i metotia 'ese'ese ma galuega fa'atino mo le fanau, o le ā faigofie ai ona vave la latou fa'alogo ma taofi mau i mea o lo'o a'oa'oina. O le tusi lava ia ua saunia atu, ua na o se fesoasoani mo lau Susuga a le faiaoga, e ta'iala ai le galuega, i se alāfua e tau fesoasoani atu ai i le a'oa'oina o le fanau. Ae o le oa ma le tamaoaiga o le galuega o lo'o i ou a'ao.

**Fa'amatalaina o le mataupu:**

1. O le ā pule lava lau Susuga i lenei Aso Sa i se auala e tatala ai le mataupu e fa'amasani ai le fa'alogo a le fanau i le igoa o le ā a'oa'oina ai.
2. E lē afāina pe afai e mulimuli pea i nai fa'amatalaga e pei ona fai i mataupu ua tuana'i.
3. O le mea lava o lo'o fia fa'amamafa i tamaiti, o le fa'alauiloaina o igoa o i latou ia mai le Tusi Paia, a'o le fa'alauteleina o ia igoa, o le fa'amoemoe lena mo le aga'i atu i luma.
4. E afua lava le fa'alauiloaina o ia igoa, i fesili faigofie e pei ona amata ai a tatou mataupu, ae afai e te silafia e gafatia e tamaiti nisi vaega o le soifuaga o ia tagata i o latou mafaufau ua i ai, fa'amolemole aua le tu'ua lena mea lelei.

**Galuega Faatino:**

1. O lau tapenaga lava i le vaiaso atoa o le ā lē fesiligia ai le saunia o tamaiti e fa'alogologo i lau Susuga, aemaise o le matuā fiafia e tali ane i fa'ata'ita'iga o le ā e saunia mo i latou.
2. O ai Aperaamo? **Tali:** O le atalii o Tara.
3. O ai le tamā o Aperaamo? **Tali:** O Tara.
4. O ai uso o Aperaamo? **Tali:** O Nakori ma Arana.
5. O ai le to'alua/avā a Aperaamo? **Tali:** O Sarai.
6. E fautuaina le faitau atoa pea o le mataupu e 12 o le Tusi Faitau mo lau tapenaga, pe afai e gafatia e le fanau.

**Fa'amanatu fa'amolemole.** Ia toe fa'amanatu pea ma saga fa'amanatu fesili e fa'atatau i tagata ua uma ona a'oa'oina, e te mautinoa ai, e lē se mea fa'alē-aogā lou tautigā i le Alii. Aua foi le naunau e fa'agasolo le tusi, a ia e mautinoa o lo'o manatua e i latou tagata o le Tusi Paia e lē toe galo, aemaise lava o le ā faigofie ai ona malamalama i tala o lea tagata ma lea tagata, i le agai i luma o lo latou olaga.

**Valiga ata:**

1. E pule lava lau Susuga i le faiga o lea galuega. A’o lona fa’amoemoe, ia fiafia tamaiti ma feso’ota’i i lau Susuga i se mafutaga mafanafana e faigofie ai ona talia le a’oa’o atu.
2. Talu ai ona o le leai o ni sapaalai a le tatou ofisa nei, e talosaga atu lava i le agaga maualalo ina ia fa’ataunu’uina pea lea vaega, saunia pea e lau Susuga ni nai pepa ma nai vali e fa’ai’u ai le aoga a nai fanau, ae o le ā totogi atu lava e le Atua mea o le ā to’esea ona o lou naunau ia mamafi le ola o nai fanau i le Atua ma lona finagalo.
3. A lē lava le taimi o lea galuega, ia fai i tamaiti e o e vali ane ni a latou ata i le fale ma avane i le Aso Sa o lumanai. Afai foi e lē gafatia le valigā ata, saunia e lau Susuga sina ta’aloga faigofie fa’alē - Tusi Paia mo le fanau. Aua nei galo ni togi mo nai tamaiti, ma e fai atu i ai, lelei tele outou tamaiti.

**Pese: Ia saunia lava sina pese pu’upu’u e fa’ai’u ai le aoga.**

**Tatalo:** E fa’aauau pea le tatalo a le Alii, ae ua tatau foi ona amata ona e maitauina pe aga’i ina tauloto ma manatua pea le tatalo lea, ae e te silafia ai foi le tamaitiiti e lē o toe mamao, ae tatalo to’atasi i le tatalo lea e fa’ai’u ai le vasega, ae tautuana aua e te vave i lea faiga, nei vave ona ma se tamaitiiti, auā e ese lava le maua i le tatalo fa’atasi, ‘ese le ge po’o le ma e tatalo to’atasi. Faifai malie pea e o’o lava ina lē toe mamā i le tatalo a lo tatou Alii, pe ā o’o ina maumautai lelei.

**Alofa atu i lau Susuga a le faiaoga ma nai tamaiti i lenei Aso Sa.**



**SETEMA 01, 2019. “ASO SA O LE TALALELEI.”**

**MATAUPU: “O IESU O LE ALII O LE TALALELEI.”**

**TUSI FAITAU: IOANE – 3: 16.**

**SINI AUTU: “Ia fa’amasani le fa’alogo a le fanau i le isi lea ta’u o Iesu, “o le Alii o le Talalelei.”**

**Fa’atomuaga:** Talu ai o le Aso Sa fa’ailogaina o le Ekalesia, o le mea lea e i ai le taofi o le ā le o’o le a’oa’oina o le fanau i le aso ma lona talafa’asolopito, ma lona fa’amatalaina foi mai le Tusi Paia. Ae o le ā aga’i lava i fanau le fa’amoemoe o le tatou mataupu. O le sini autu o lo’o fia tuliloa mo le fanau, ia ma’ea lenei vasega, ua sāua i le fa’alogo a le fanau le isi lea ta’u o lo’o fa’alupe ai le Alii o Iesu, “o le Alii o le Talalelei.” O le mea mautinoa, ua fa’alogo tamaiti i le igoa o Iesu, ua tali foi e tamaiti le fesili lea, O ai lou fa’aola?...O Iesu. O lona uiga ua manatua e tamaiti o Iesu o lo latou fa’aola. O le mea lea, ia taumafai lava e fa’afaigofie loa i nai tamaiti le ala e lelei ai le tala iā Iesu, aisea? auā o ia o lo tatou faaola. O Iesu la o ia o le Alii o le Talalelei.

**Faamatalaina o le mataupu:**

1. Fesili i tamaiti po’o ā mea e fiafia ai. O le ā tele le mau tali auā e lē uma mea e fiafia ai tamaiti.
2. E mautinoa e leai se tamaitiiti e fa’apea ane e fiafia i se tala. O lou avanoa lena e te fesili ai, pe fiafia i ni tala e fa’alogo i ai. Afai e ioe ane le fanau, ona e amata loa lea i le fa’amatalaina faigofie i tamaiti, so’o se tala lava e fiafia i latou e fa’alogologo i ai, o le mea lena e ta’u o le talalelei.

3. Taumafai loa lea, e ta'u i ai o le tala ia Iesu, o le tala e lelei, auā o le tala fiafia i lo tatou fa'aola, toe polili i ai le fesili e fa'amautu ai le fiafia e fa'alologo ia te oe, O ai lou fa'aola?..... O Iesu.
4. E fua lava e lau Susuga a le faiaoga i tamaiti, le auala e fa'amatalaina ai le mataupu i le silafia o lau Susuga e ma'ea ane ua maua se 'ai o nai tamaiti i lenei Aso Sa.

**Fa'atinoga o le mataupu: Fesili ma valiga ata.**

1. Fesili masani, O ai lou fa'aola? **Tali:** O Iesu.
2. Tou te fiafia i ni tala lelei tamaiti.....O le a tali ane lava i latou i lau Susuga.
3. Tou te fiafia i le tala ia Iesu?.....O le ā tali ane lava tamaiti.
4. Aisea tou te fiafia ai i le tala ia Iesu?... Fa'atali lau Susuga i ni nai tamaiti o le ā tali ane....A uma ona e taumafai lea e ta'u i ai le ala e tatau ai ona fiafia i le tala ia Iesu.
5. Fa'asolo atu ai lea i le 'autu o lenei Aso Sa, O Iesu le Alii o le Talalelei.
6. Tautuana lava ia faigofie lou siufofoga ma upu e te fa'aaogaina e fa'atino ai le mataupu. Manatua e tāua tele fegaua'iga o le leo i nai tamiti laiti ia, atoa ai ma taga e fa'atino, ma foliga e fa'amatala ai upu.

**Valiga ata.**

1. Ou te iloa pau lea o le ata e faigofie ona maua, e talosaga atu ai i le loto maulalo, ina ia saunia ni kopi o le ata o Iesu ua masani ai le va'ai a tamaiti, e fa'atino ai latou galuega valivali o lenei Aso Sa.
2. Fa'atonutonu pea e lau Susuga le valiina o a latou ata. E lelei foi ae fa'amasani atili i latou i lea lanu ma lea lanu. Fesoasoani i tamaiti e ta'u i ai le lanu e tatau ma lea vaega ma lea vaega o le ata.
3. Fa'ata'ita'iga: Afai o le lauulu, ia vali i le lanu uliuli, ae lē o le mūmū, ma fa'apena ai i isi vaega uma, e tāua foi lena mo fanau.
4. Manatua lava ia togi ata a nai tamaiti ma momoli i ai se fa'amalō ia latou galuega, ia lagona ai e i latou o lo'o fa'atāuaina lo latou a'oa'oina, e lelei ai le feso'ota'iga ma lau Susuga, ma atili ai le fiafia e fa'alogi i le a'oa'o atu ia i latou.

**Pese:** Tele pese fiafia o le Talalelei, saunia se pese faigofie mo nai fanau, e fa'ai'u ai le mataupu o lenei aso.

**Tatalo:** Manuia i lenei Aso Sa, ae saunia e lau Susuga se tatalo faigofie toe pu'upu'u mo le Aso Sa o le Talalelei, ae fa'ata'ita'i ma mulimuli atu ai le fanau, ona fa'ai'u fa'atasi lea i le tatalo a le Alii.

**Manuia tele le Aso Sa o le Talalelei, alofa atu mo outou faiaoga ma le fanau.**

////////////////////////////////////

**SETEMA 08, 2019.**

**MATAUPU: “O PAULO LE APOSETOLO.”**

**TUSI FAITAU: Galuega- 9: 15.**

**SINI AUTU: Ia fa’amasani le fa’alogo ma maitau le tagata o Paulo, o le auauna i le Talalelei iā Iesu.**

**Fa’atomuaga:** E lē faigofie ona fa’amatala le tagata o Paulo. Ae fautuaina lau Susuga a le faiaoga ina ia fesili pea i ni fesili faigofie e fa’alauiloa ai le tagata o Paulo. O le tala’aga o Paulo ma lona vala’auina ma mea na o’o iā te ia, o le ā i ai se taimi oi luma. O Paulo, o le isi ona igoa o Saulo. O lona nu’u o Taso. Sa ia fialia i le talalelei iā Iesu, le ala lena na ia to’aga ai e fa’ailoa i tagata le talalelei iā Iesu. Sa fialia e tala’i o Iesu o le Alo o le Atua. O le talosaga lava ia fialia fanau aua nei ‘iva i latou i le taliga o fesili. E ta’u pea e lau Susuga le tali i le fanau e fa’amasani ai le fa’alogo ona fa’ata’ita’i lea o tamaiti, ina ia manatua ai. O le faiga lava lena i Aso Sa uma i le taliga o fesili a tamaiti ia.

**Fa’amatalaina o le mataupu.**

1. E lelei ona toe fa’amanatu atili le mataupu o le Aso Sa ua mavae, auā e feso’ota’i le Alii o le talalelei ma le Aposetolo o le talalelei.
2. Ia e taumafai pea e muamua oe i le fa’aleoina o upu ae fa’ata’ita’i atu i ai le fanau. A uma foi ona tali mai le tama po’o le teine, ia e fai atu i tamaiti e patipati, tusa lava pe sa’o pe sesē le tali e tu’uina ane, ona taumafai lea o lau Susuga e ‘ao le tali sa’o ua e silafia iā i latou ia taofi mau ai.
3. E pei lava ona talosaga atu, aua le noatia i’inei nisi auala e tele ua e silafia e talafeagai lelei ma le matutua o tamaiti, e a’oa’oina ai i latou.
4. E lelei foi le fa’aaoga o mea faitino e fa’amatala ai le mataupu, ia po’o le fa’aaoga foi o tamaiti e fa’atinoina le tala i taga ae fa’amatala e lau Susuga.

**Fa’atinoga o le Mataupu: Fesili ma valiga ata.**

1. O ai le igoa muamua o Paulo? **Tali:** O Saulo.
2. Toe fa’aupu le fesili muamua, O ai le isi igoa o Paulo? **Tali:** O Saulo.
3. Na fialia Paulo i le Talalelei iā Iesu? **Tali:** Ioe.
4. O fea le nu’u o Paulo.? **Tali :** O Taso.
5. Toe fa’aupu le fesili e lau Susuga, O fea e sau ai Paulo? **Tali:** O Taso.

**Valiga ata.**

1. O le ā ta’oto lava le vaega lea i lau tapenaga i Aso Sa uma, o le fa’amoemoe ia galulue tamaiti, ae mafai ai foi ona momoli atu ai i’ina ni nai fesili faigofie mo latou e uiga i ata o lo’o latou valiina.
2. Ia manatua pea ia fa’amalō i tamaiti ma ave se togi o ā latou galuega ina ia fialia ai i latou.
3. Ia fai i ai e ave lana ata i lona tamā ma lona tinā e matamata ai, atonu o le ā fialia ai matua e avatu le fanau i le aoga i Aso Sa uma.
4. Ia fialia fanau i le aoga ma ā latou galuega e galulue ai, o le ā maua ai le mafanafana ma lau Susuga a le faiaoga. Aua lava le ita fa’amolemole i nai fanau.

**Pese:** E tele pese e ta’ua ai le igoa o Paulo, ae saunia e lau Susuga se pese faigofie toe pu’upu u e pepese ai tamaiti. Afai e i ai ni taga o le pese, aua le tu’ua fa’amolemole.



**Tatalo:** Pule lava lau Susuga i auala e fa'ata'ita'i ma fa'ailoa ai i tamaiti o le tatalo le mea o lo'o fai. A ia manatua o le tatalo lava a le Alii e mo'omia ona tauloto fa'a- pi tautau e le fanau.

**Manuia le aoga i lenei aso sa.**

////////////////////////////////////

**SETEMA 15, 2019.**

**MATAUPU: "O SAMUELU."**

**TUSI PAIA: 1. SAMUELU – 1: 20.**

**SINI AUTU:** Ia fa'amasani le fa'alogu ma taumafai e maitau le tagata o Samuelu.

**Fa'atomuaga:** O lo'o fa'asolosolo pea nai tagata o le Tusi Paia mo le fa'alogu ma le maitau a le fanau. O le mea lea, malō lava le onosa'i i lau Susuga a le faiaoga. E itiiti lava le fatu o lo'o taumafai e totō i fanau i lo latou soifua mālaulau ua i ai. A'o le fa'amoemoe ma le fa'atuatua, o le ā tupu tele ma fua mai i le lumana'i lo latou mamafi e manatua ma taofi mau tagata o le Tusi Paia, e ala i lou gapātia i le a'oa'oina o si fanau. Ta'oto pea le fa'alauteleina o tala iā Samuelu, ae aga'i pea la tatou fa'amamafa i nai fa'alauiloa faigofie ia vave taofi ma manatua e le fanau mo le aga'i atu i luma.

**Fa'amatalaina o le mataupu.**

1. O fesili masani lava o lo'o taumafai atu ia manatua muamua ai e fanau lea tagata ma lea tagata o lo'o a'oa'oina.
2. Aua le taofia lau tapenaga lelei pe afai ua e mautinoa ua tatau ma talafeagai mo le fanau.
3. Ave pea le avanoa i fanau e tali ane ai i fesili, ae fa'afetai ma fa'amalō i ai lau Susuga.
4. Fa'amanatu atu, o le Tusi Faitau e mo lau Susuga, ae lē faitauina e le fanau.
5. Faaaoga pea le Tusi Faitau e fai ma taitai I le mataupu, ae maise mea taua o loo taua ai.
6. O lo'o tamāoaiga pea lau tapenaga mo le fa'amatalaina o le tagata ua a'oa'oina i lea Aso Sa ma lea Aso Sa. Malō lava le tapena.

**Fa'atinoga o le mataupu: Fesili ma valiga ata:**

1. O ai Samuelu? **Tali:** O le tama a Hana.
2. O ai le tinā o Samuelu? **Tali:** O Hana.
3. O le ā le galuega a Samuelu na fai? **Tali:** Na fai ma perofeta ma fa'amasino iā Isaraelu.
4. O le ā le uiga o le igoa o Samuelu? **Tali:** "Auā na ou fa'atoga i le Alii mo ia."
5. E mafai lava ona fa'aopoopo nisi fesili e lau Susuga pe ā gafatia e le fanau.

**Valiga ata:**

1. O le pau lea o le galuega e fetau lelei mo tamaiti ia, ae afai e te silafia se ta'alogu o le Tusi Paia mo latou, ia po'o se fa'atinoga faigofie foi, ua matua sili atu lena.
2. E lelei pe ā amata ona talanoa i fanau e fai i matua e alu atu ma avatu sana pusa vali i le aoga, e lē taugofie foi lea mea mo lau Susuga i vaiaso uma.
3. O le faiga lava e fiafia ai le fanau o le mea sili lena, a le o le tufa i ai o le ata e valivali, o le tufa i ai o le pepa e tusi ai le ata ma taga o ia e valivali.
4. Ia fa'afetai ma fa'amalō i le fanau ma ave i ai se togi o ana galuega i lenei Aso Sa, ma fa'atosina lona loto ia toe alu atu I le aoga i le isi Aso Sa o soso'o ai.
5. Ave le ata e fa'auma mai le fale pe afai e lē lava le taimi.

**Pese:** Usu se pese e saunia e lau Susuga ma ni taga e fiafia tele ai tamaiti, e fa'auma ai le vasega o lenei Aso Sa.

**Tatalo:** Fa'ai'u i le tatalo a le Alii, ia pe fa'ata'ita'i foi i se tatalo e saunia e lau Susuga a le faiaoga pe ā tusa ai ma sou finagalo.

### **Manuia le Aso Sa i lau Susuga ma le fanau.**

////////////////////////////////////

**SETEMA 22, 2019.**

**MATAUPU: "O SOLOMONA."**

**TUSI FAITAU: II. SAMUELU – 12: 24.**

**SINI AUTU: Ia fa'amasani le fa'alogo ina ia iloa ai ni nai tala amata o le tagata o Solomona.**

#### **Fa'atomuaga:**

1. Manatua lava e lē faitauina le Tusi Paia i le vasega lea, ae mo lau Susuga auā lau tapenaga ia lava mo le tagata o le ā talanoaina o lenei Aso Sa, e fesoasoani i le vaivai o le tusitala ua fa'asoa atu.
2. E leai lava se fa'amoemoe o le ā matua mamafa le a'oa'oina o le fanau lea i le loloto o tala e uiga i tagata o lo'o a'oa'oina, o le vaega tele lena mo le aga'i atu i luma ma matutua i latou.
3. O le talosaga lava ia maumautaia lava la latou fa'alogo i igoa o lo'o e taumafai e a'oa'o atu. Fa'aaauu pea ona fai fesili fa'avae ua tu'uina atu e fa'amanatu ai iā i latou le tagata o lo'o a'oa'oina.
4. O le fa'amanatu masani lava, afai lava e te silafia e gafatia e tamaiti pe ā mamafa atu lau tapenaga, aua le taofia, a ia fua lelei lava, i e fiu e tatali ua lē toe fia o ane i le aoga, ona e lē o malamalama ma fiafia.

#### **Fa'amatalaina o le mataupu:**

1. Silasila pea i le Tusi Faitau, e lelei foi ae e fa'amalosi e faitau atoa le mataupu, e tele ai le oa e maua, e fa'amatala ai le mataupu.
2. O le lelei lava o le siufofoga ma le fegauga'iga o le leo, e te maua lelei ai le fa'alogo a le fanau.
3. E mafai foi ona e a'oa'oina fa'atauloto se vaega faigofie o le Tusi Faitau, ma fai ni taga o au tala o lo'o fa'amatalaina ai Solomona.
4. E lē fa'atonuina ae fautua atu i le loto maulalo, ina ia fua lelei le a'oa'oina o le fanau i lo latou malosi.

#### **Fa'atinoga o le mataupu. Fesili ma Valiga ata.**

1. O ai Solomona? **Tali:** o le atalii o Tavita. 2. O le tama a Patisepa.
2. O ai le tamā o Solomona? **Tali:** O Tavita.
3. O ai le tinā o Tavita? **Tali:** O Patisepa.
4. O le ā le galuega a Solomona? **Tali:** Sa fai ma tupu o Isaraelu.

**Valiga ata:**

1. Pule lau Susuga a le faiaoga pe vali se ata i lenei Aso Sa pe fai sina ta’aloga fa’alē – Tusi Paia e fa’amautu ai fesili o lo’o i luga e fa’atautu iā Solomona, a gafatia foi, fa’aopoopo e lau Susuga nisi fesili pe ā e finagalo i ai.
2. Ia fiafia tamaiti, ae maitau e lau Susuga po’o maua se ‘ai o lau taumafaiga i lenei Aso Sa.
3. O le fa’afetai lava ma le lelei tele aua nei galo ia avatu mo le fanau, ma fai atu i ai, o lou togi ua maua e fia.....

**Pese:** E sili atu foi lau fatu pese i lo Solomona, e ā sina pese mo tamaiti e te saunia e sisiva ai ma fai ni ā latou taga, e fa’aiu manuia ai le tou aoga i lenei Aso Sa.

**Tatalo:** Amata ona fa’aleotele le tatalo a le Alii, e ta’ita’i e lau Susuga a le faiaoga, ma tauloto fa’atasi e le fanau, e fa’aiu ai le mataupu.

**Malō le onosa’I, malō le fa’amalolosi i lenei Aso Sa.**

////////////////////////////////////

**SETEMA 29, 2019.**

**MATAUPU: FESILI MA TALI.**

**SINI AUTU:** Ia toe fa’amanatu i fanau fesili sa a’oa’oina i Aso Sa ua tuana’i, e fa’amausali atili ai lo latou manatua ma le iloa o tagata sa a’oa’oina.

**Fa’atinoga o le mataupu:**

1. Pule lava lau Susuga i le auala e faia ai fesili, pe tali fa’atasi tamaiti pe auaua’i ta’ito’atasi. E lē mafai ona tusi ni ā latou tali i ni pepa fa’amolemole.
2. Afai e i ai nisi fesili e te saunia, aua le taofia, a ia talafegai lelei ma le fanau, aua ne’i faigatā.
3. Manatua lava, aua nei e fai atu i se tamaitiiti e sesē lana tali, a ia e saili i se auala e mafai ai ona ia maua ma iloa le tali sa’o.
4. Aua le ita pe ā tele au fesili, ae lē sa’o lava le tali a le tamaitiiti, o le tele o auala e te saunia, o le tele foi lena o le avanoa e toe manatua ai e le tamaitiiti le tali sa’o.
5. Fa’amalō ma ave le lelei tele i tama ma teine o le aoga, a maua le tali sa’o ia patipati le vasega ma fa’afetai i ai.
6. E tatau ona ave sina togi mo tamaiti e tauia ai lo latou tigaina, ae fai ma auala o le ā fiafia ane ai i le aoga.
7. Ia i ai se api a lau Susuga e fa’amaumau ai togi o tamaiti mo le i’uga o le tausaga.

**FESILI MA TALI.**

1. O ai lou fa’aola? **Tali:** - O Iesu.
2. O le ā foi le isi igoa ua fa’aigoa ai Iesu, ona o le lelei o le tala iā te ia? **Tali:** - O le Alii o le Talalelei.
3. Aiseā e lelei ai le tala iā Iesu? **Tali:** O le tala i le fa’aola o le lalolagi.
4. O ai le igoa muamua o Paulo? **Tali:**-O Saulo.
5. O fea le nu’u o Paulo? **Tali:** - O Taso.
6. O ai Samuelu? **Tali:** - O le tama a Hana.
7. O ai le tina o Samuelu? **Tali:** - o Hana.
8. O ai Solomona? **Tali:**-O le atalii o Tavita. **2. Tali:** - O le tama a Patisepa.

9. O le ā le galuega a Samuelu? **Tali:** - Sa fai ma fa’amasino ma tupu o Isaraelu.
10. O le ā le galuega a Solomona? **Tali:** - Sa fai ma tupu o Isaraelu.
11. O le fa’amanatu, e lē tasi se auala o le ā tali ane ai le fanau, fa’amolemole, aua nei fa’asesēina se tali a se tamaitiiti, ae fa’afetai i lona taumafai ma saili e lau Susuga se auala e manatua ai ma iloa le tali sa’o.

**GALUEGA FA’AI’U:**

1. Ia tusia e lau susuga i se fasi pepa le aofa’i o togi o lea tama ma lea teine ua e manatu e tatau mo lona taumafai. Ona tu’uina lea i le tamaitiiti e alu e ave i lona tinā ma lona tamā e fa’aali i ai. Tautuana aua nei fai atu i se tamaitiiti o ia e lē pasi ona togi, ia ave pea i ai le fa’amalō ma le lelei tele, ae tulimataina e lau Susuga le lumana’i o tamaiti i le a’oa’oina. E lē tutusa lava malosi o fanau, aemaise o le laiti o ō latou tausaga, a’o le mea tāua, ua e maitauina le lelei ma le vave o le latou fa’alogo.
2. Tautuana ia ta’u pea e lau Susuga le tali sa’o pe afai e lē manatua e le fanau. E lē o se suega le galuega lea, a’o se isi auala e tuli tatao ai le a’oa’oina o le fanau ia maumautaia tagata o lo’o latou a’oa’oina.
3. Ia i ai se api e fa’amaumau ai togi o le fanau mo le i’uga o le tausaga.

**Pese:** Afai e le’i saunia se pese, e lelei lava ona toe fa’amanatu a outou pese sa a’oa’oina o mataupu ia, o le auala foi e fa’amalosia ma fa’amautuina ai lea vaega o pese, ae lelei foi pe afai o pese o lo’o ta’ua ai tagata ia sa outou a’oa’oina.

**Tatalo:** Mo lenei Aso Sa, fa’amolemole, aua e te tatalo i le tatalo a le ALII, e pei ona outou tatalo fa’atasi ai, ae tu’u le avanoa e tatalo ai tamaiti, ae faamanatu e lau Susuga upu o le ā lē maua e le fanau a’o fa’agasolo le tatalo.

**Manuia le taliga fesili, aua le ita i tamaiti fa’amolemole.**

////////////////////////////////////

**OKETOPA 06, 2019 – OKETOPA 20, 2019. ----- MALOLOGA MO LE LOTU TAMAITI’**

**MANUIA TELE LE ASO SA PA’EPA’E FA’AILOGAINA O LE FANAU.**

**OKETOPA 27, 2019.**

**MATAUPU: “O ELISAPETA LE TINĀ O IOANE LE PAPTISO.”**

**TUSI FAITAU: LUKA – 1: 13.**

**SINI AUTU: Ia fa’amamafa le fa’alogo a le fanau ina ia iloa ma manatua o Elisapeta le tinā o Ioane le papatiso.**

**Fa’atomuaga:** Malō le fa’atoatoa i lau Susuga a le faiaoga i le galuega lē faigofie. Fa’afetai le onosa’i malō le lava papale. Taofi sa maua se malōlōga filemū ina ua ma’ea ai le pisi i le tapenaga o le Aso Sa o fanau. Viia le Alii i galuega lelei uma sa fa’atinoia. Ia, ae alo ane ia auā le toe fa’auauina o ā tatou feau ma galuega i le tau fa’ai’ui’u o le tausaga.

O le tala o lenei taeao o le tau fa’ama’iteina lea o tinā o le Tusi Paia. E leai lava se suiga mai le amataga, o le galuega lava lea mo le vasega lea, o le fa’alauiloaina lea o tagata o le Tusi Paia, a’o laiti latou. O nisi o tinā o le ā taumafai e fa’ailoa atu, o tinā masani lava, ae o le fa’anaunauga ia amata ona a’oa’oina i tamaiti e ala i le latou fa’alogo ma taumafai e manatua. Manatua, o lo’o ta’oto pea le loloto o tala i tagata o lo’o tatou talanoaina, ae ua na o ni nai fa’ama’ite laiti ma faigofie lava, e fua i fanau. Faifai malie ou faiva, ma ia saga’i ane ‘ai o le tai a’o sauni e fa’atili foe o le tausaga.

**Fa’amatalaina o le mataupu.**

1. Taula’i pea lau fa’amamafa ia iloa e tamaiti o le tinā o Ioane le papatiso, o Elisapeta.
2. E lelei ona fa’ama’ite i fanau le to’alua po’o le avā a Elisapeta.
3. E tāua tele foi ona ta’u i tamaiti le mea na tupu iā Elisapeta, ae aua le mamafa.
4. O le ā ta’oto atu pea i lau Susuga i lau silasila pe ono fa’alautele le faalauiloaina o le tinā lea, ae talosaga atu lava, aua nei maumau lou tautigā ae fo’ifua si fanau i lenei Aso Sa.
5. Silasila pea i le Tusi Faitau mo au tapenaga, ma fa’alautele atili ane pe ā tusa ai ma lou finagalo.

**Galuega Faatino: Fesili ma Valiga ata.**

1. O ai Elisapeta? **Tali:** O le tinā o Ioane le Papatiso.
2. O ai le tinā o Ioane le papatiso? **Tali:** O Elisapeta.
3. O ai le avā/to’alua o Elisapeta? **Tali:** O Sakaria.
4. Aiseā na fa’anoanoa ai Elisapeta? **Tali:** e leai sana tama/ e lē fanau.
5. E pule lava oe i nisi fesili pe ā e silafia ua fa’aosofia loto o tamaiti ma naunau tele i lau taumafaiga o lenei Aso Sa. Fa’amolemole aua le taofia.

**Valiga ata:**

1. O le talosaga masani lava, o le galuega lea e te tapenaina mai le fale. E lē mafai ona fai, pe afai e fa’atoā susue lau tusi i le taimi o le a’oga.
2. Fa’amolemole lava o le tusi e mo le tapenaga a lau Susuga, a’o le’i o’o i le Aso Sa, ae lē o se tusi e faitau i tamaiti.
3. Fesoasoani pea i tamaiti e fa’atonutonu le valiga o ata, o le tāua o lea faiga, ia maua ai pea le feso’ota’iga vāvālalata a lau Susuga ma tamaiti.
4. Fa’amasani ai foi i latou ia iloa lea lanu ma lea lanu, ia iloa foi le ata o lo’o valiina.
5. Afai e lē maua le ata o le mataupu, e fa’utuaina ia fa’aaoga so’o se ata ua maua mai tala o le Tusi Paia e valivali ai tamaiti, ma e taumafai e fa’ailoa i ai.
6. E fa’asoa lelei e lau Susuga le taimi mo le vasega.

**Pese:** O lau Susuga lava o le ā paū i ai le vaega lea o pese, ona e lē mafai e fanau ona usu ni pese faigatā. Saunia lelei e lau Susuga se pese pu'upu'u ma ni taga mo le fanau, na pau lena o le ala e vave maua ai ma tauloto upu o le pese, o le fai o taga.

**Tatalo:** Fa'aauau le faiga na gata ai le a'oa'oina o le tatalo a le Alii. Tatalo le fanau, ae fa'asa'osa'o e lau Susuga ni vaega o le ā misi iā i latou.

### **Manuia le aoga i lenei Aso Sa.**

////////////////////////////////////

**NOVEMA 03, 2019.**

**MATAUPU: "O LE TINĀ O TAPITA."**

**TUSI FAITAU: GALUEGA – 9: 36.**

**SINI AUTU: Ia amata ona fa'alogo ma taumafai e manatua le tinā o Tapita, mo le aga'i i luma.**

#### **Fa'atomuaga:**

O le ā ta'oto pea le fa'alateleina o ā tatou tala mo le aga'i atu i luma, ae fa'amamafa pea le taumafai e fa'alauiloa ma fa'ama'ite lea tagata ma lea tagata o le Tusi Paia. O le tala o le taeao lenei, o le tinā o Tapita, e seāseā ona fa'alogo i ai le fanau, ae tele a'oa'oga lelei e maua mai lea tinā pe ā o'o ina matutua ma latou a'oa'oina. Fa'amolemole silasila pea i le Tusi Faitau mo au tapenaga, ia faigofie ai lau galuega, o lena ua fa'afaigofie atu le fa'asoa mo le vasega lea, ae tatalo atu ia faia ma le naunau ia maumautaia e si fanau tala amata ia o lea tagata ma lea tagata. E talosaga atu lava i le loto maualalo, ina ia saili i le gagana aupito faigofie ma upu aupito taofi gofie e feso'ota'i ai le mataupu ma tamaiti. Manuia le galuega o lenei Aso Sa.

#### **Fa'amatalaina o le mataupu:**

1. E pule lava lau Susuga i le fa'amatalaina o le mataupu, ae tautuana ia fa'amamafa lava le sini, o le taumafai i fesili e fa'amasani ai le fa'alogo ina ia manatua ai le tagata o a'oa'oina.
2. O le fa'amatalaina o Tapita, o lo'o momoli ma faa'malosia mai e fesili o lo'o tu'uina atu i galuega fa'atino, a'o lona fa'amatalaina o le ā ta'oto atu i lau Susuga i le fa'amatalaina faigofie.
3. Ia tautuana ia aua nei umi se taimi e fa'amatala ai le mataupu, a ia lava se taimi e fa'atino ai le a'oa'oina o tali o fesili o lo'o tu'uina atu, o le oso tāua lena o le fanau mai le mataupu o lo'o e a'oa'oina.
4. O lo'o ta'oto lava i galuega fa'atino le fa'amamafa o le vasega lea, tasi, lua, tolu ni nai fesili e maua o le aso, ua lava ma totoe.
5. Taumafai lau Susuga ia maua se avanoa e feso'ota'i ai ma matua i le a'oa'oina o le fanau. O le isi lea auala ua manatu i ai le ofisa, o le ave i le fale fesili o lo'o e a'oa'oina i le vasega i lea Aso Sa ma lea Aso Sa, e toe fa'amanatu ai, o le galuega lena a le matua e fai tou te galulue fa'atasi ai.
6. E te iloa gofie ai foi le matua o lo'o fesoasoani i lana tama, ma le matua e 'ese le ala o lo'o alofa ai i lana tama, ae fa'amoemoe e a'oa'o e isi. Manuia le galuega o le Aso Sa.

#### **Galuega fa'atino: Fesili ma Valiga ata.**

1. O ai le isi igoa o Tapita? **Tali:** O Toreka.
2. A o ai le isi igoa o Toreka? **Tali:** O Tapita.

3. O le ā le mea na tupu iā Tapita po’o Toreka? **Tali:** Na oti, ae na toe ola.
4. Se tina lelei Tapita pe leai? **Tali:** Ioe, o le tina sa tele ana galuega lelei ma ana meaalofo sa fai.
5. Fa’amalamalama laitiiti e lau Susuga tali o nai fesili na mo si fanau. Fa’afetai fesoasoani mai.

**Valiga ata:**

1. Afai e afea i lau fa’amatalaina o le mataupu galuega a Tapita sa fai, ou te manatu o le vaega tonu lea e fa’alautele ai le manatua o fanau i le tinā o Toreka po’o Tapita, o le valiina lea o ni ata o ni ofu, auā o le galuega lea a le tinā.
2. Saunia e lau Susuga ni ata o so’o se ofu, i so’o se lapo’a, ae vali e tamaiti. Afai e tau manatua le su’iga o ofu i atunuu ia i na ona po, o se mea lelei foi.
3. E lelei le vali o ata ma toe polili pea i ai le fa’amatalaina o le tinā o Tapita, i lau tapenaga na faia mo le vasega.
4. Silasila ane pea i le Tusi Faitau mo lau tapenaga, e fuafua lelei ai le mamafa o le fa’amatalaina o le tinā i fanau. Aua nei faigatā fa’amolemole, ne’i e ita i le lē ano ane o tamaiti, ona ua ‘iva le fa’alogo. O le fa’atino lava e umi ai na fa’alogo tamaiti o le vasega lena.

**Pese:** E fai ā e lau Susuga le tonu, afai e le’i saunia se pese, ona fa’amanatu lea o pese ua uma ona usuina. E lē o se agasala lena mea, ae manatunatu ai pea mo le lumanai.

**Tatalo:** Fa’ai’u e lau Susuga i se tatalo pu’upu’u e fa’ata’ita’i atu ai tamaiti i lau Susuga, ona tatalo fa’atasi lea o le tatalo a le Alii.

**Fa’afetai le onosa’i, malō le fa’atoatoa.**

////////////////////////////////////

**NOVEMA 10, 2019.**

**MATAUPU: “O LE TINĀ O EUNIKE**

**TUSI FAITAU: II TIMOTEO – I: 5.**

**SINI AUTU: Ia a’oa’oina tamaiti i le latou fa’alogo ia manatua ma iloa le tinā o Eunike pe ā aga’i pea i luga le a’oa’oina i le Tusi Paia.**

**Fa’atomuaga:**

Ua o’o la tatou talanoaga i si tinā o Eunike, e seāseā foi ona afea i le fa’alogo a le fanau. A’o tala o le tinā lea, e maoa’e foi le tāua ma aoga o a’oa’oga fa’alē -agaga mo i tatou. O le ā lē mafai lava ona malamalama tamaiti i ia a’oa’oga, se’iloga e matutua ma a’oa’oina ai. A’o le tatou galuega mo le taimi nei, o le fa’amasani i le fa’alogo i igoa ia, e amata tapena ai lo latou iloa o le Tusi Paia ma tagata o lo’o maua mai ai a’oa’oga mo i tatou uma ma le fanau. O le tapenaga masani lava a si tusitala o le tusi nei, e pu’upu’u toe faigofie mo lau Susuga, ae aua le taofia ai le oa o lau tapenaga mo si fanau, a ia manatua lava aua le faigatā, a ia faigofie. Aua e te fa’atupuina lou ita ona ua lē tali ane tamaiti, o lona uiga ua lē fiafia e fa’alogo. E lelei pea le matuā tapena o galuega fa’atino mo tamaiti ia, o le ā lē maumau ai lou afu i le galuega.

**Fa'amatalaina o le mataupu:**

1. Silasila pea i le Tusi Faitau mo lau tapenaga fa'amolemole, e fua i ai le mea o lo'o e manao i ai e avatu i tamaiti mai le mataupu, e fesoasoani i le vaivai o le tusitala ua fa'asoa atu.
2. O le tu'ualalo masani lava e logologo pea, aua le faigata, aua foi le avea se manatu o lo'o e finagalo i ai, ae le maua i le fa'alogo a le fanau. O le gagana faigofie lava ma taga, o le fegaua'iga o lou leo ma galuega fa'atino, o le a vave ai le taofi a le fanau o le tupulaga lea.
3. E pei lava ona talosaga atu, e tele nauanau metotia o lo'o silafia e lau Susuga a le faiaoga e a'oa'oina ai le mataupu, a ia manino lava lona sini 'autu, e pei ona taumafai atu ai se vaivai o le tusitala.
4. Ua tu'uina atu pea nai fa'ama'ite faigofie i fanau e uiga i tagata ta'ito'atasi o lo'o talanoaina, ae afai e gafatia e le fanau, ona fa'alauatele teisi lea e lau Susuga fa'amolemole i se gagana ma ni fa'atinoga faigofie.

**Galuega fa'atino: Fesili ma valiga ata:**

1. O ai Eunike? **Tali:** O le tama a Loi.
2. A o ai la Loi? **Tali:** O le tinā o Eunike.
3. O ai le tama a Eunike? **Tali:** Timoteo.
4. O fea e sau ai Eunike? **Tali:** O Iutaia.
5. Fesuia'i ane e lau Susuga nai fesili na, pe toe fa'aupu foi fa'a-faigofie, ina ia maumautaia lelei e fanau le tali.

**Valiga ata:**

1. Afai e lē maua se ata o le mataupu e uiga iā Eunike, ia vali pea nisi ata o le Tusi Paia e saunia e lau Susuga mo lenei Aso Sa.
2. Afai foi e leai, ia tapena se ta'alogo fa'alē-Tusi Paia, e ta'ā'alo ai tamaiti. Tautuana lava fa'amolemole, a leai se galuega e fa'atinoaina e le fanau, o le a matuā faigata le galuega o le Aso Sa.
3. Aua foi nei gata ai i totonu o le falesa, ae fua lelei e lau Susuga le taimi, e lelei foi ae asiasi i sina asiasiga pu'upu'u i fafo i le lotoā, ma e talatalanoa ai e uiga i fesili o lo'o e taumafai lava ia maua ma taofi e tamaiti, a'o tuputupu a'e.
4. Ua na o se fa'amanatu, ma se fa'amalosi, pe ā tusa ai ma sou finagalo lau Susuga a le faiaoga.
5. E fua mea uma i le taimi, pe ā tusa ai.

**Pese:** E lelei foi ae fa'ai'u ai i fafo i le lotoā le tou vasega i ni pesepesega mo lenei Aso Sa, i pese ua uma ona usuina. O le fa'amoemoe, ia suia le siosiomaga mai totonu o le falesa ua masani ai, i fafo mo lenei Aso Sa e vivi'i ai.

**Tatalo:** Pi'ilima uma tamaiti ma fai le tatalo a le Alii, ona toe foi ai lea i totonu o le fale sa.

**Manuia le aoga o le Aso Sa.**





**NOVEMA 17, 2019.**

**MATAUPU: “O SALOME LE TINĀ O IAKOPO MA IOANE.**

**TUSI FAITAU: MATAIO – 20: 20.**

**SINI AUTU: “Ia amata ona fa’alogo ma taumafai e manatua le tinā e igoa iā Salome.**

**Fa’atomuaga:**

O le tinā o Salome e seāseā foi ona fa’alogo i ai tamaiti, o le ā tatou taumafai e amata ona latou fa’alogo i ai a’o laiti. E lē mana’omia le tele o ni tala e fa’amatala ai le tinā lea, o le galuega lena o lo’o fa’asolo atu i luga. O fa’ama’ite ma fa’alauiloa masani lava e pei ona tatou galulue mai ai. O nai fa’amaumauga lava o tagata ua maua e le tusitala ua fa’asoa atu, ina ia faigofie i lau Susuga ma taofi e tamaiti. E lē o tamaiti uma foi o le ā vave ona maua, ae o le ā fesoasoani lava le agaga o le Alii i fanau ma lau Susuga i le a’oa’oina o i latou, e lē mafai ona maumau lou tautigā i le Alii, e ala i le a’oa’oina o fanau i le Tusi Paia ma ana Afioga. Fa’afetai tele lē lava onosa’i, auā e lē faigofie au tapenaga i lea vaiaso ma lea vaiaso.

**Fa’amatalaga o le mataupu:**

1. Ia fai pea le Tusi Faitau ma fesoasoani i lau Susuga a le faiaoga, e taula i ai lau tapenaga o le fa’amatalaina o le tagata o Salome.
2. E pule lava foi lau Susuga i le fa’amatalaina, a ia lē alu ‘ese ma le sini po’o le fa’amoemoe o le a’oa’oina o tamaiti o le vasega lea.
3. E lē matuā manaomia tele e le fanau iti ia se fa’amatalaga tele, e aunoa ma lo latou fiafia i ai. O lona uiga, ia laititi le fa’amatalaga, ae tele lava le fa’atinoga.
4. O le mamafa lava o le a’oa’oina o le fanau lea, e fa’alagolago i lau Susuga a le faiaoga, fa’amatala fa’atasi ma taga ma lou si’ufofoga fa’agau loto i le fanau, ina ia maua lo latou fiafia e fa’alogologo iā te oe.
5. E fua e lau Susuga le taimi ina ia lava le taimi mo galuega fa’atino.

**GALUEGA FA’ATINO: Fesili ma Valiga ata.**

1. O ai Salome? **Tali:** O le avā po’o le to’alua a Sepetaio.
2. O fea le nu’u po’o le a’ai e sau ai Salome? **Tali:** O Kapanaumi.
3. E to’afia lana fanau? **Tali:** E to’alua tama.
4. Afai e mafai ona fa’ailoa igoa o tama ua lelei tele lau Susuga a le faiaoga.
5. O le faiga masani lava o fesili, ia toe fa’auapu ma fesuia’i, ae tumau lava le tali, ina ia fa’amasani le latou fa’alogo i so’o se itu e fa’auapuina ai fesili ina ia le taotasi le fa’alogo.
6. O le ala lena o le lē faigofie o si au galuega. Ae momoli tele atu le fa’afetai i lou onosa’i ma le lava papale i lenei foi Aso Sa, ma Aso Sa uma i le galuega. Fa’amanuia tele atu le Atua.

**Valiga ata:**

1. E leai se tasi na feiloa’i ma Salome, o le mea lea fa’aaoga pea se ata e mafai ona e tapenaina e valivali ai nai tamaiti i lenei Aso Sa.
2. O le isi lelei o le galuega valivali, e fa’amasani atili ai tamaiti i le ‘ese’ese o lanu, e aoga foi mo i latou i le lumanai.
3. O le ā taoto pea i lau Susuga le galuega fa’atino lea i lona fa’ataunu’uina, ae aua nei noatia ai nisi galuega e te silafia e fiafia ai fanau.

4. Ua na ona tu'uina atu o valiga ata i le tatou tusi, ae e pule lava lau Susuga i nisi galuega fa'atino e fetai mo le fanau, ona e vaivai lava si tusitala o le tatou tusi, ia pe tufa loa le bongo ma le vai aisa, ia o ia lava lena.
5. E fua fa'atatau mea uma i le taimi. Manuia le galuega o lenei Aso Sa.

**Galuega e ave i le fale:**

**\*\*\*Tusia e lau Susuga se tatalo pu'upu'u lava ma le faigofie, ona tufa lea i tamaiti e ave e fesoasoani i ai lona tinā i le a'oa'oina o le tatalo, ia o ane i le Aso Sa oi luma ua faigofie mo oe.**

**Pese:** Manatua o le vaiaso o le ā sau o lo'o fa'atāua ai le aso Faaafetai e tatou. E ā pe ā amata ona tapena sau pese mo le aso faafetai, ae fa'amautu i le Aso Sa o lumanai. Ua lava se fuaiupu se tasi ma nai taga e teuteu ai, ia ua uma lālā.

**Tatalo:** Fa'ata'ita'i e lau Susuga se tatalo fa'afetai pu'upu'u faigofie i fanau mo le vaiaso o le ā sau. Ona fa'ai'u foi lea i le tatalo a le Alii.

**Manuia ou faiva fa'a-faiaoga i lenei Aso Sa.**

////////////////////////////////////

**NOVEMA 24, 2019. ASO FA'AFETAI.**

**MATAUPU: "O LE UPU FA'AFETAI."**

**TUSI FAITAU: I TESALONIA – 5: 18.**

**SINI AUTU: Ia amata ona fa'amaite i fanau le upu Fa'afetai, ma lona fa'aaogaina faigofie i aso uma.**

**Fa'atomuaga:**

Talu ai ua fa'ataua fa'apitoa lenei aso e le atunu'u ma aulotu, o le mea lea ua manatu ai, e tatau ona fa'ailoa ma fa'amasani pea tamaiti i le upu Fa'afetai ma lona fa'aaogaina faigofie ua tatou masani ai. E leai lava se manatu o le ā loloto se talanoaga i le itu fa'alē-agaga o le Fa'afetai, e pei ona fa'amatalaina i le Tusi Faitau, peitai, ia amata ona a'oa'oina ina ia ānoa ma uigā i fanau le loloto o le upu fa'afetai a'o tutupu ae pea i latou. Taula'i pea lau silasila i ni nai fa'atinoga faigofie mo le fanau, e amata totō ai le upu faafetai i ō latou loto. Ua masani lava ā tatou tamaiti i le fa'aaogaina tele o le upu faafetai i le taimi o taumafa, pei nā o le pau lea o le taimi e lē galo ai. Ia pule lau Susuga pe fa'aaoga lena foi metotia masani. E lē o se faiga a le tusitala o le tusi, o le faiga ua masania ai tagata o le atunu'u. Fa'afetai tele mo le galuega lē faigofie.

**Fa'amatalaina o le matupu:**

1. O lo'o manino le Tusi Faitau, ua na'o se fesoasoani mo lau tapenaga lau Susuga i le faiaoga. Ae ua manino foi ma faigofie le sini autu o lo'o fia tuliloaina e le mataupu o lenei Aso Sa.
2. Taumafai pea ia faigofie mo lau susuga, ae ia sili atu ona faigofie mo le fanau, ma latou maua ai le fa'amoemoe o lo'o fia totōina mo i latou.
3. Pe afai e telē sau tapenaga, aua le taofia, a ia mautinoa lava e lē o alu vale lou malosi e fa'amatala, ae lē o fa'alogo le fanau. Fua lava e lau Susuga le fa'amatalaina o le upu ma ni fa'ata'ita'iga faigofie toe taofi gofie e tamaiti, i le taimi o le vasega.
4. Fai ma fai ni nai pati ma ni nai po e fa'aala ai le fanau. Ae a ni nai oso se tolu pe sili atu foi, e a? Va'ai i le manaia!!!!!!

**Galuega fa'atino: Fa'atinoga o le foai ma le talia o mea.**

1. E lelei i lenei Aso Sa pe ā fa'aogaina ni mea faitino e fa'amalamalama ai le fanau i le uiga tonu ma le taimi e fa'aaogaina ai le upu fa'afetai.
2. Ia fa'amasani tamaiti i le mafua'aga o le upu fa'afetai. E fa'aapefea ona maua, ia po'o le ā foi le pogai.
3. O le fa'atinoga o le nonō ma le talia e pogai ai le upu fa'afetai i lona fa'aaogaina so'o ua masani ai.
4. A mana'o i se mea mai se isi tagata, ona fa'amolemole lea, a talia le mea na mana'o ai mai le isi tagata, ona fa'afetai lea.
5. E tāua foi ae fa'amasani fa'atasi tamaiti i le fa'aaogaina o le fa'amolemole ma le fa'afetai, auā e lē mafai ona fa'aaoga le isi upu, pe ā leai le isi upu
6. E fua lava e lau Susuga le fa'atinoina e tamaiti, ma ni mea e fa'ata'ita'i ai ona fa'amolemole ma fa'afetai i le agaga o le mataupu.

**ATA FAAMATALA.**

1. Ia tusia e lau Susuga se ata o se aiga o lo'o nonofo fa'ata'ali'oli'o i le laulau ai, ma mea'ai o lo'o i luga o le laulau. O matua ma le fanau o lo'o i le ata, o lo'o punonou ma pi'ilima lima, ma moei'ini mata.
2. Ia fa'aali lelei i tamaiti le ata, ona taumafai loa lea o lau Susuga e fa'afaigofie ni fesili, e mafai e tamaiti ona tali ane ai. E lē o tamaiti uma e iloa le galuega lea, a'o le fa'amamafa o le galuega lea, o le feso'ota'iga ia fa'ama'ite i fanau, a fai mea'ai i le aiga, ia fai le tatalo fa'afetai i le Atua. O le fa'afetai sili i fa'afetai uma e ave i le Atua, ua tatou maua mai ai mea uma.
3. Ia fa'amautu i fanau le uiga o le pese o mea'ai ma le tatalo e fai so'o e fanau pe a talia mea'ai, o le fa'afetai i le Atua.

**Pese ma le tatalo:** E manuia tele ae pepese tamaiti i le pese masani o mea'ai mai le tatou Tusi pese. ("Malie pule lelei Tamā.....), soso'o atu ai ma le tatalo masani o mea'ai e fa'ai'u ai le aoga, ona tufa loa lea o ni nai bongo ma sina vai aisa, e fa'amanatu ai le Aso Fa'afetai.

**Manuia tele le Aso Faafetai i lau Susuga ma le fanau.**

////////////////////////////////////

**TESEMA 01, 2019.**

**MATAUPU: O MARIA LE TINĀ O IESU.**

**TUSI FAITAU: LUKA - 2: 16.**

**SINI AUTU: Fa'amasani atili le fa'alogo ma amata fa'amautu i mafaufau o tamaiti, o Maria o le tinā o Iesu.**

**Fa'atomuaga:** E i ai le taofi e lē fou i lau Susuga le tinā o Maria, peitai, o le tatou galuega mo fanau ia, o le fa'amasani atili le fa'alogo ma taumafai e maitau le tinā o Maria, i le avea ai o ia ma tinā o Iesu. Aua lava nei faigatā i tamaiti fa'amolemole le tala o lo'o i le Tusi Faitau, afai e te manatu e fa'aaoga, ia fesoasoani mo lau tapenaga. Malō le onosa'i, toe tasi lava si Aso Sa o lumana'i, ona maua foi lea o si malōlōga.

### **Fa'amatalaina o le mataupu.**

1. Fa'aaoga pea le Tusi Faitau pe ā e finagalo i ai, a ia faigofie ma pue gofie e tamaiti.
2. Fa'amatala ni mea faigofie e manatua ai o Maria o le tinā o Iesu.
3. O le faiga lava sa tatou amata mai ai, o le faiga aupito faigofie lena mo fanau iti ia, ma lē maua ai se ita i laua Susuga.
4. Fa'amatala ma fa'atino i galuega fa'atino. Ia lē taofia foi auala e te silafia e fa'amatala faigofie ai le tinā o Maria, ia vave ona manatua ma lē toe galo i fanau pe ā matutua.

### **Galuega fa'atino: Fesili ma Tali ma Valiga ata.**

1. O ai Maria? **Tali:** O le tinā o Iesu.
2. O ai le tinā o Iesu? **Tali:** O Maria.
3. O ai Iosefa? **Tali:** O le tamā o Iesu.
4. O ai le tamā o Iesu? **Tali:** O Iosefa.
5. O ai matua o Iesu? **Tali:** O Iosefa ma Maria.

### **Valiga ata:**

1. O le faiga masani lava o le valigā ata fa'amolemole, ae lelei pea ona taumafai lau Susuga ia maua se ata o Maria e valivali ai. Afai foi e maua ma se ata o Iosefa ua lelei tele auā e o fa'atasi lava le to'alua lea, ae manatua atili ai e le fanau e lē toe galo.
2. A i ai ni tamaiti ua maoa'e le taumafai i le vasega lea, ave i ai le pepa ma fa'aali i ai le ata o Maria, ona tago lea e fa'ata'ita'i ona tusi i le pepa.
3. Pule pea lau Susuga i le fa'atinoga o le mataupu, aua nei taotasi i le valigā ata, ae lelei foi ona fa'aaoga metotia o lo'o i lau Susuga.

**Pese:** Amata ona a'o se pese o le Kirisimasi, auā ua va'ava'ai atu i lona o'o mai i lenei tausaga.

**Tatalo:** Fa'ai'u e lau Susuga i se tatalo, ona tatalo ai lea o tamaiti i le tatalo a le Alii.

### **Malō le onosa'i, toe lava o se aga ona malōlō lea.**

////////////////////////////////////

**TESEMA 08, 2019.**

**MATAUPU: FESILI MA TALI.**

**SINI AUTU: Ia toe fa'amanatu ma toe fa'amautū i tamaiti fesili sa o latou a'oa'oina mai i mataupu sa outou galulue ma talatalanoa ai. Ae maise lava o le fa'amamafa mo fanau laiti ia, e te silafia ai ua i'u le tausaga a ua ta'itasi le gogo e lele ma si ana i'a.**

### **Fa'atomuaga:**

1. E pule pea lau Susuga a le faiaoga pe fa'aaoga nai fesili ua tu'uina atu pe saunia lava e lau Susuga nisi fesili, ae fa'amolemole ia fua i tamaiti ma mea sa o latou a'oa'oina. E pule foi lau Susuga pe tali fa'atasi tamaiti pe tali ta'ito'atasi. E lē mafai lava ona tusitusi tamaiti ia i ni ā latou tali i ni pepa. Fa'amolemole ia togi lava e lau Susuga a latou tali, ma fa'amauamau i sau api, ona fa'aopoopo lea o togi o le tausaga, e fai ma ala o le ola finau ma le tauivi o fanau. E lē fa'amamafaina atu e le ofisa se laugatogi mo Aoga Aso Sa ma Autalavou, ae a fai e mafai ona tupu, o se auala foi lea e taofi o le ā finau ma fialia ai le fanau i Aoga Aso Sa. O le fa'afeagaiga

lava o le aulotu, o lo'o i ai le ki ma le tatala o lea vaega, ae ua na o se fa'ama'ite, pe ā tusa ai ma gasologa o le galuega.

2. O mataupu o loo fa'aaogaina i fesili nei, o le mataupu mai ia- OKETOPA 27, 2019 – TESEMA 01, 2019.
3. E lē se agasala pe ā fa'a-tu'ua lau vasega i sina vai aisa ma sina aisakulimi ma si fanau... Fai atu ai foi!!!

### **FESILI MA TALI.**

1. O ai Elisapeta? **Tali:** O le tinā o Ioane le papatiso./ O le to'alua o Sakaria.
2. O ai le to'alua o Elisapeta? **Tali:** O Sakaria.
3. O ai le tinā o Ioane le papatiso? **Tali:** O Elisapeta.
4. O ai le isi igoa o Tapita? **Tali:** O Toreka.
5. O le a le mea na tupu ia Toreka po'o Tapita? **Tali:** Na oti ae na fa'aola e Peteru.
6. O ai Eunike? **Tali:** O le tama a Loi./ O le tinā o Timoteo.
7. O ai Loi? **Tali:** O le tinā o Eunike.
8. O ai Salome? **Tali:** O le to'alua o Sepetaio.
9. E to'afia lana fanau? **Tali:** E to'alua tama.
10. O ai igoa o tama? **Tali:** O Iakopo ma Ioane.
11. O le ā le upu e fai pe ā e manao i se mea mai se isi tagata? **Tali:** Fa'amolemole.
12. A avatu e se isi iā te oe le mea na e manao ai, o le ā le upu e fai? **Tali:** Fa'afetai.
13. O ai e tatau ona fa'amuamua iā tatou faafetai. **Tali:** O le Atua.
14. O ai matua o Iesu? **Tali:** O Maria ma Iosefa.
15. O fea le nuu na fanau ai Iesu? **Tali:** O Petele'ema.
16. Manuia le taliga fesili!!!!!!

**UPU FA'AIU:** Maua lenei avanoa e momoli tele atu ai le fa'amalō ma le fa'afetai iā te outou uma o faiaoga o le Vasega Amata muamua. Malō le onosa'i malō le fa'apalepale, e lē faigofie le 'apepeleina o le ola fa'ale-agaga o fanau laiti ia o nu'u ma aulotu. Ua tau foi ma outou, aemaise o mea ua to'esea ona o le naunau alofa i fanau. Ia toe fa'atutumu e le Atua lo outou tamāoaiga ua fa'aaogaina mo fanau. O le tatalo ia maua lo outou malosilalo fa'ale-agaga ma malōlōina i le tino, auā lenei galuega faigatā ua auauna ai i le Atua, e lē totogia i le olaga nei, ae ioe i le fa'atuatua, e tau mai i le lagi iā te outou i so'o se ala. Fa'afetai- Fa'afetai tele le galulue, Tatou fa'apea ane, o tatou o auauna lē aoga i le galuega, ae ia fai le sao ma taulaga e viia ai le Alii. Alofa'aga ma fa'amanuiaga mai le Auaigaluega. Tatou feiloai i le tausaga fou, pe ā pule alofa le Atua e sopo i ai lo outou soifua ma lo matou ola. Manuia le tu'uaga, manuia tele le kirisimasi ma le tausaga fou.

Soifua: Auaigaluega Ofisa o A'oa'oga Kerisiano - EFKAS.







**Tautua Printing Press**  
**Congregational Christian Church of American Samoa**  
1 Kanana Fou Street, Box 1537  
Pago Pago, American Samoa 96799  
[www.efkasonline.org](http://www.efkasonline.org)